

四庫全書

集部

欽定四庫全書

巽齋文集卷十四

宋 歐陽守道 撰

記

韶州相江書院記

生民以來未有盛於孔子此親見聖人者之言也前猶
未有後孰得而並之然魯孔子父母國諸弟子學於其
門其沒也魯君一誅而止門人三年而歸闕里之教於
是寂寥矣近魯者齊昔者歷聘之所首至孟子得其傳

而仕於此亦嘗一稱仲尼而對其君然身不留道不行
固無望其君能推其學之所自出而表章先聖於過化
之地也夫道能信於萬世而相去未遠之時齊魯視之
蔑如其空言之幸存恃有門人與孟子而已烏在其爲
生民以來之最盛者哉夫亦要諸久而已矣通祀比之
社稷立學遍於郡縣巍巍乎萬世一人當時親見聖人
者之言蓋至此而愈信也後千五百年我宋濂溪先生
周元公出所著之書惟太極一圖與通書四十章而通

書亦惟推明太極圖之意二程子少而師之至於朱文公繼作乃推尋二程子之言見其合於圖書而信其得於授受於是圖書之傳益以光大學者尊之幾與易論語等天子特爲之表章於上自是元公之里居與其仕國所在奉祠堂建書院矣此孔子所未嘗得於齊魯者也何其盛哉竊嘗疑之當熙寧間元公在南二程子在北而元公以癸丑歲沒二程子母乃未之聞耶後十有四五年二程子之道下信於門人上信於君相而自朝

廷至四方曾未有知元公之師道者其後洛學再厄而
譏毀不及於元公則猶幸其未嘗彰顯於熙寧元祐故
耳今學者得圖與書而學之蓋稍出於中興以後而最
盛於三四十一年也孔子得通祀與立學於千餘年之後
而元公祠堂書院近見於百餘年間就百餘年觀之則
熙寧元祐之人所未能通知者亦必待今日而後大顯
晦久近又各有時皆非人之所能爲耶嶺南韶爲文獻
國刑獄使者臺治在焉元公所嘗蒞之官也往年長沙

愚齋楊公持使節築相江書院於帽峯之麓中爲祠堂
旁居學徒後人屢有增拓且立先聖殿而受賜額於朝
矣越十有九年公之兄之子謙仲父繼以是節來又益
大之視前加倍而規制之端正則韶士以爲是具上庠
之體者也謙仲父前爲道州濂溪書院旃於其手先帝
御書六大字以表之今復爲此於韶以成愚齋公之志
殆若一家之事父基而子堂之者道猶魯韶猶齊二書
院同出於一人甚矣於斯文拳拳也予昔與謙仲父同

朝而韶士亦有與予相聞者以書來請曰元公昔使此部將漕兩年僅八月而去之其未去也巡歷屬部無虛月留此州之日甚淺所著圖書又未出是當時之親炙曾不若今日之聞知也二楊先生惠後學至矣願記書院之大成而因有以詔我予不敢辭則復之曰圖書固元公義理之極致然二程子之師之也竊意斯時講聞大意成書之出與否未可知也後又遠不相聞非若孔門諸子終其身而事夫子者故伊川謂明道自十五六

聞周茂叔論道慨然有求道之志未知其要出入於諸家汎濫於老釋者幾十年反求諸六經而後得知深味此語則元公固亦開示其端而徐俟其自得云爾夫以親受學於元公而猶曰未知其要及其得也則以求諸六經之力然後與元公之學脗合而無毫髮之差蓋六經聖人之心在焉元公之學之所自出也二程子從其學之所自出而學焉斯與元公同其所得矣今元公圖書滿天下其文至約家傳而人誦之也猶有如二程子

自謂未知其要而又求諸六經於受學十年之學者乎
必如是然後自得自得然後信元公真吾師也不然莫
要於圖書夫既傳誦之矣所憂者自得不在我耳以元
公爲之師猶退而求之六經者二程子也見元公於圖
書而曰吾知之矣六經可以無求矣噫此則二程子所
不敢也予方自爲此懼而安能效寸益於相江書院之
士乎敬爲書院記歲月而已愚齋公名大異初建書院
於淳祐丁未謙仲父名允恭更新書院於景定甲子次

年咸淳改元秋八月廬陵歐陽某記

白鷺洲書院山長廳記

皇帝在位之三十有九年詔吏部諸授書院山長者並視州學教授嚴陵黃君嘉爲白鷺洲書院山長聞之欣躍曰上嘉惠斯文至矣昔者山長之未爲正員也所在多以教授兼之自前年創入部闕建議之臣無見於教化之本原請以授文學之權入官者而書院滋輕矣今命下而輕者頓重其敢不盡心所職以仰稱樂育人才

之德意然此洲書院可容諸生數百而余忝爲之長乃假私屋以居諸生訪我於燕閒無所布席私屋不可常假後之繼余者又莫知當寓何所即此一陋人且不屑來尚何州學教授之視乃以聞於郡得地於城內之東南出便門數十步即一葦至洲矣材木瓦石與凡工役百須之費多方經畫銖積而寸累之佐以俸給之餘爲門廳堂室便坐數處數月而成高明寬潔內外整整無復缺欠其餘力猶足以備器用亦皆堅好可以支久而

書院養士之所資尚無積也黃君蓋去替纔期月其意徒欲自今山長有屋可居實與州學教授體貌均一以稱上所以假寵此官之意故其竭力如營私家事傳京師新進士之當注教授者曰白鷺洲書院山長新居成吾願爲黃君代曰與其爲他郡教授孰與爲白鷺洲山長相先後也若有快於心而求文於某以爲記竊惟古者庠序學校之教自國都至於鄉黨蓋域民而居各有所故即其聚而教之周衰道失民散於是先知先覺始

自淑其徒於門而其徒固亦在國都鄉黨與凡仕聘往來之國未有隱居深山衆往從之如後世所稱逸人高士之在某所者蓋時君雖不復修學及有如孔孟者則猶能發弟子孰為好學之問致諸大夫國人有所矜式之意未至與上之人漠不相聞也世又愈降詩書禮樂不在國而在野於是山中之教興然其高者則遂爲藏身避世之歸而去明德親民成已成物之學遠矣惟今所謂書院則不然蓋自五季斯文墜地之後先朝未詔郡

縣皆立學之前巖穴之士自相講授而當時固已官其
人又賜書籍於其山以光寵之至於大儒繼作以孔孟
之事爲已任則又有出於公家學法之外五峯胡先生
力辭召命自請爲嶽麓山長自是山長之稱人以爲非
有實行粹學者莫宜居而近歲書院相望天子每親灑
宸翰以頒及是又優待其官如此蓋地方千里而教授
纔一人郡客之而不敢僚今山長甫與爲二如吾廬陵
士至二三萬挾策來遊者不於州學則於書院書院中

授徒立所而爲長者乃王官受命於朝前代未之有也
三代國都鄉黨之學無所與於巖穴之士後世山中之
教不出於上之人主張而今日兼之我宋文風於是最
盛矣或謂學以教授名官而書院但曰山長不無小異
愚謂不然昌黎韓公謂師者所以傳道授業解惑故教
授之名人皆知其爲師然自孔子教人未嘗以師自居
子路而次以齒列坐猶曰以吾一日長乎爾毋吾以也
則長亦不居矣故史記弟子列傳人人書其少孔子若

千歲孟子語其徒時亦自稱長者長固對少者言之視
門人猶父兄之於子弟也夫惟有如此親之之意故教
易入若曰吾師道也庸知其年之生於吾前吾後此在
學者尊師則然而爲之師者豈敢謂道實在我哉某昔
嘗侍古心先生於書院初建之歲是時山長未有人先
生親爲諸生講授載色載笑與從容水竹間忘其爲太
守古賢侯蓋有意於成就後進者使之親已如此此所謂
猶父兄之於子弟今山長廳成黃君日布席以待諸生

其親之也又得加密於臯比橫經時矣敬爲君書此意
使吾黨之士共體此以相親而并以告後之人君字亨
父寶祐四年進士清苦有守居是官甚宜蓋雖已仕而
未改山中之樂者

六香吟屋記

龍泉郡君中立名軒而舍旁列植竹桂梅蘭蓮菊名曰
六香吟屋日吟其間立軒吟屋命意則有間矣而吟與
學妨與君遊者將莫不疑之也乙卯之夏以其詩數十

篇示余而請曰是其區區鄉慕時不自揜於五七字之間儻有契於子心者軒若屋願辱記其一余既讀而愛之熟視其氣貌細聽其議論知其爲雅志好修之士也爲之言曰世謂詩人者其人品最不一蓋亦有美才焉然嗜詩之癖或至於此以自足其平生棄其可學孔孟之身而畢力於漢魏晉唐翰墨之士之間域是固稍有志者之所歎閔而其自附講學則亦往往號舉而實不隨六經之文儒先之訓摘取一二揭之齋塾軒窓使稱

已者以代名字東南之士如是不可以百計矣而人才日衰觀世道者深憂之計今科舉之外士所爲尤異不入於此則入於彼以君之雅志好修亦豈不觀此而有所不快哉然予察君於微君蓋用意向裏者也以立名軒蓋有所願望有所從事非如彼所爲以代名字而已者余欲爲君記之而古今聖賢格言具在予何所見而敢贅乎惟所謂六香吟屋者有可與君言君多吟吟與學妨宜乎或以疑君今若舍吟而專學則更不虛此屋

也昔之美人貞士鮮不以芳潔之草木自況之六草木者不惟爲供吟設也而吟又何必曰詩韓退之曰口不絕吟於六藝之文朱子曰整襟正坐緩視微吟吟固讀書之謂讀書於此芳潔之所如其有得環視草木若與我同一忻然者興趣所寄間一詩之亦何不可第不必專以吟人自命耳噫亦嘗即六物之見取於君者思之乎人豈無不如彼草木者乎好惡猶人之情也則好善惡惡可以鼻之於臭推其心之所同然夫德修於身非

有氣臭之可聞也而書惡穢德惡腥聞至於明德則曰
惟馨何也善惡充積之極皆將薰蒸浮達於上下四方
者故令聞廣譽之類言其聲見面盎背之類言其色而
此又以氣臭言之皆所謂藏之不可揜也君讀書之暇
起而撫翫此六香於庭吾置此身於六香之間彼以香
而爲吾所好安敢謂彼無知而不有好惡於我耶彼草
木也謂之有知則否然而好則有知也知好彼而不知
自好不可也不能使好我之如此六香不可也知自好

且使好我者如我之所好豈爲媚於人哉有可好之實而已矣詩曰好是懿德中立勉之

三勿堂記

萬安賴君淵甫名其堂曰三勿長樂陳君舜卿書之以告予求記予問取義云何曰是孟子教人養氣之說必有事焉而勿忘勿助長也予曰然孟子固三言之而其所以言則二也必有事焉故勿忘勿正故勿助長也故曰所以言則二而已爾且孟子以舍苗揠苗爲喻非舍

即堰非堰即舍而豈三說哉予將因所喻而究言之農之爲田終歲勤皆事也不敢一日忘所事雖然日至而熟天也雖有神農后稷不能今日種而明日穫也今吾盼盼焉日擬其熟以療饑則必至於爲宋人之堰故不事者忘而正者助長也欲免此二病其亦即所謂養而深思之乎既曰養矣焉有忘而得謂之養焉有助長而得謂之養養也者常令生意接續不疾不徐無過無不及以遂其自然之天也天之於物春生而夏長之亦猶

是也陽以生育長養爲事祥風甘雨應時而至所謂養也苟得其養無物不長不然非旱乾則水溢其爲失其養均也予嘗謂義理之學人人可從事求之常言自有至理今言養氣而多爲之說將愈見其支離不若深味養之一字知所謂養雖微勿忘勿助長之訓釋當自得之矣然予觀孟子此章寫其所自得者以淑後學謂之浩然之氣塞乎天地之間其說甚奇先儒以爲前聖所未發就實言之浩然也者蓋人人所同有惟其有之故

可養也如其本無則復何養人於未有愧怍之先雖匹夫無不浩然者特不如孟子之知之且能言之耳一有愧怍雖平日號爲賢人君子至此亦且心不寧而顏怍怩故善觀浩然之本體者觀於其所反此浩然者索然時也吾不使之索然是之謂養而無害曰是集義所生者非義襲而取之行有不慊於心則餒矣知其如此義必盡而不爲一至之襲心必安而不使一事之餒此自吾日用飲食事也常存此念斯勿忘已未至於所養純

熟之地不必急迫淺躁或常留悔吝以累其中或故作矜持以驚乎外斯勿助長已賴君以孟子本文之言勿者三故揭三勿於堂是其志也志立則氣從之予告以孟子本意有三之義而相與勉焉君他日義無一不盡心無一不安爲天地間仰不愧俯不忤之人然後自信其所謂浩然者固如此而孟子不吾欺也作堂記

翠微亭記

予既爲宋瑞記碧落堂堂之右一峯峭立平處有亭基

宋瑞得之郡人曰是所謂翠微者也故與碧落並表於此郡中廢四十年矣亦復之山之腰曰翠微謂自下望高蒼然一色至此而所見微也百圍之木在上平地以爲不盈拱把鴻鵠高舉卑飛之雀自疑過之君子抗志浮雲之表不求合乎卑凡之見彼不我見則我尊矣雖君子何容心不能揮手謝衆人亦不能人人引其手使與已俱也老子曰搏之不得名曰微是山故嘗有仙吾知仙之爲道歛之使益微者翠樾滿山白雲往來安知

斯人不時到其間乎宋瑞小留待之同日記

舜祠記

僧了敬建

學者皆言先王之道衰而後佛氏之說入於中國爭出力排之不謂佛生於極西之地去中國不知幾萬里而其教得至此蓋亦甚異先王盛時吾中國之所謂西其疆理若邠岐之類固已曰迫近西戎矣而惟虞書稱外薄四海光天之下西之最遠者曰被於流沙流沙之名不再見於詩書也故曰後有作者惟虞帝不可及已况

於後世雖吾先王衣冠禮樂之地猶且化而爲夷則夫
流沙之外豈復知爲上世盛德之所嘗被者哉我
不能
有以化被而彼重譯之言得以行乎吾之境爲中國者可
以自反焉用彼之排也夫使盛德皆如舜則流沙固在
吾風化之內也歷世愈久被德當愈遠彼教能來者吾
教固亦能往中國之三綱五常獨不可入於佛之西方
助佛之教棄其君臣父子與凡天性之親而衣服容貌
不與華同吾之人有聞而倣之者既不能禁又利僧牒

之驚而許之則雖傾一世而爲佛吾將誰尤而可廬陵之屬邑萬安有寺曰永福僧名了敬者邑之劉氏子也削髮有年讀佛之書甚習然吾儒詩書終不忘於心其於鄉多與知名之士游而時以詩文示予予讀之見其所嚮甚正有父在志於奉養而牽於其教不能自還一日慨然謂予曰吾所居寺名曰韶山相傳舜南巡時至此奏九成之樂不知信否寺之後有高潔之地木屋予欲以爲舜祠何如予曰悲哉子之妄也然舜前代帝非

民間所得祠況爾異教乎敬曰竊亦疑之然嘗聞舜有天下而不與豈知身之爲帝今但以其爲萬世聖人顏孟皆許學者師之吾於聖人萬世如見耳前代帝祠在天下不一所其初若非民間私立而誰立且予教有所謂禮梁武者以梁武爲宗師是亦前代帝而世莫之罪也設他或罪我祠舜予退聽焉而安敢固哉予不復問祠之可否所欲問者南巡至此而奏樂此傳信乎否也予曰舜南巡至衡山書所記也此地去衡山遠未必然

也今度嶺而南亦有韶石舜峯遂以之名州往往遠方
之人思慕盛德蒙此名於山川間耳雖異時韶樂在陳
傳至於齊吾夫子得聞之當舜生之時斯樂達乎天下
謂此地嘗奏韶樂焉其孰曰不然且王迹熄於春秋樂
工固嘗散亡四出若非盛時之樂自達於此又安知哀
世之後無抱其器至如入河入海者何必曰舜於此自
奏哉敬曰若爾則予爲祠屋復何疑夫敬之志可嘉書
以遺之使其成則求石刻焉爲祠記

吳齊文集卷十四

欽定四庫全書

吳齋文集卷十五

宋 歐陽守道 撰

記

知非齋記

前太守豐城李侯扁其所居讀書之室曰知非而移書於某使爲之記曰予少而讀書頗有四方之志出身從仕三十年矣切守聖賢之訓以爲處事接物反之吾心而安則爲之不安不敢爲也然不知吾之所謂是乃人

之所謂非自信不移以犯世僂且以區區一書生而天子畀之民社曾無一二善狀以上稱宵旰憂民之心亦既自知不能祈解印組而去計不決卒自納於罟獲陷阱而無所避當此之時此身九死不足復顧而臣子至此上負君親則雖偷生假息而不知天之我覆地之我容也今行年五十幸而天子寬貸弗誅而來日幾何補過無及猶思竊取古人知非之云以名吾齋朝夕觀焉以愧痛悔父子有以告我乎某復於侯曰侯誠有取於

知非之云則侯所知者他人不與知也是非之心人皆有之以吾之心省吾之身而從事於克治之學辟如善衛生者四肢百骸少有疾苦皆能自覺其所從致之原而於治療常易也疾在吾體而問之他人彼非真有察脉觀色之明亦安能知吾病之真在乎雖然辱侯之問不得不有告也敢問侯之所謂非者何也實自見其非乎抑因人所爲非而亦曰非也古之賢聖未嘗不受盡言聞怨詈則皇自敬德聞人告以有過則喜然至於非

我不以其道則聖賢容有弗受者矣彼有以奪吾之自信又況今日之事侯似有恐懼憂患之累焉夫憂患恐懼不能無亦不可無然至於虛心觀理之時當如湛然止水纖芥不留而後一毫髮可得而盡燭也侯方在恐懼憂患之中而以知非自命是水方動搖而遽監焉者也萬一憂患恐懼稍失其守則非者未必知知者未必非後之所差滋有甚於前矣願侯於此正心而靜觀之夫天與人以善不與人以惡是以人當爲君子不當爲

小人得是非之正吾爲不負天矣人縱我非而實則天之君子也失是非之正吾爲負天矣人縱不我非而實則天之小人也是非之極至於判焉爲君子小人而是非之分惟吾心獨知之是天之惠我光明使我得爲此而不爲彼也然則人惟毋失是非之心人而少失是非之心非所以事天也天君一也爲天之君子以事君吾無欺也爲天之小人以事君吾欺也侯誠於此而內揆焉則是非之正卓然不失不是其所非亦不非其所是

矣侯知天命而畏焉者也夙夜戰兢上帝臨女於以答
聖天子全宥之恩其庶幾乎某淺陋無聞而侯辱命之
倘以斯言爲然則請記於齋之壁

雩都縣重修主簿廳記

主雩都簿劉君李明用私錢新公廨而以書請記於余
曰事末爾不足記仰而思之我王官也登降王民勾稽
王賦敢曰吾一簿卑乎今廨之僅存者敝甚敝者撤矣
予居此必千日而後去千日之久上加漏旁加歎是僅

存又將撒也撒且盡後無爲此官者乎予以私錢新之
非也使公錢易得前人不以是敝者付予矣予不可以
愈敝者付後人子盍爲我記之使來者知其嘗敝如此
而新之之難也予復之曰今所在主簿若無所職然數
日待更誰復有意於治此解其知有此職者也敢問簿
何職簿爲輸賦之民設也有此邑輸賦之民而後有此
官此邑輸賦之民散居於郭於鄉於大山深谷之間而
名數皆在簿也主之者不朝夕人人見之知其名數若

常在目矣古人之敬民見其名如見其人故成周之世
拜受民數以圖國用而進退之其藏也於天府此國中
都鄙郊野之數也諸侯各敬其國之民宜亦類此郡縣
立而海內一民一賦皆天子命官以主之今縣之爲薄
也曰某縣某鄉元管戶幾何新收戶幾何祖額稅租幾
何開闢減免幾何其或登或耗即國用進退之原也縣
以簿申州州還付之縣而遂爲帳申之轉運司轉運司
爲帳申之戶部其由此而登之天府如古之重其事與

否與非主簿所知所知者簿之方造吾固與之矣主簿
卑官也坐之不庇風雨之廨不辭獨不念簿所登載之
戶先王所敬也人之有寶器而甚愛之也縑籍以將之
滕匱以藏之而守掌者亦藉是以享室宇之安吾主此
簿而堂不足以容已廡不足以容吏顧於此乎日視其
舊管新收而計其賦入哉嗟乎是亦褻民數矣孔子式
負版者負於他人之手先聖一見則式之況官號主此
而常接於目乎然則一新此廨若將以宇覆此名數字

覆此名數是亦宇覆此人也庶幾知式負版之心者也
請用此書君意何如他日君書再至曰美哉其言之乎其
又警予願得刻之石乃書以遺之廨外門內屢出入游
息之所昔無而今有者居三之二其一因舊而大葺焉
君去年攝丞通衢二門其一屬丞者君餘力所及也君
爲是役邑宰趙侯亦有以相之是以速集於成君名鋒
予同郡人趙侯名若僖晉江人寶祐三年四月甲申廬
陵歐陽某記

吉州龍泉縣丞廳記

縣置丞尚矣龍泉丞省於紹興復於紹定其省以主簿兼之其復以兼主簿以主簿兼之居主簿解治丞事宜也以兼主簿丞宜有解矣而猶居主簿解主簿解又敝甚不可居而自復至今久敝無創建者何故縣知有令不知有丞今所在然也不惟縣不知有丞丞亦不自知丞何謂不謂縣事皆已當問顧謂問侵令大抵以善避權勢爲賢丞自處如此令利之丞不自處如此令直以

爲侵已也韓退之記藍田壁已云然則丞不丞亦尚矣
丞省無解丞復亦無解噫何怪哉豫章熊君達生爲丞
之朞月所居主簿解一日壞君謂吾丞也丞解宜我始
於是度地於是市樹於是鳩工爲門爲廳爲廊爲東西
便廳爲堂爲室規模宏而制度稱觀瞻聳而閒燕適異
時主簿解西面至是而南主簿解故有堂堂前有小廳
君謂吾職共二是亦不可廢遂以餘力葺之東偏凡用
緡錢千錢大半君俸也書來求予記予爲之辭曰古今

殊時封建郡縣異制而理民一也縣雖統於郡百里猶
子男國小國必有大夫縣必有佐貳以侵長自嫌則大
夫於其國君也自嫌乎抑可所否所以相成乎丞八品
官命於天子天子命我丞而自嫌侵長此於長爲媚媮
已逸而已且長固有大負而小試安知無集衆思廣忠
益之心奈何一以喜顓惡偏量之也大夫於其君猶曰
君臣令丞比肩立丞於縣亦尊矣居室以便閒燕姑勿
論諸爲聳觀瞻地其規模制度自宜下令一等非曰以

自尊大將使民習知已之可君長令或召趨朝或上府
若使家則百里皆吾責於以鎮撫順便也今民甚易丞
也民甚易丞丞自卑無以爲縣重也然則君之新丞解
甚宜於龍泉尤宜復丞之初郡太守西堂范公應鈴實
請於朝曰龍泉外隣猺峒內蔽遮萬安太和得丞贊縣
一郡蒙利范公之請如此而既復之後二十有七年丞
無解嗟乎是役可以已乎君家范公同郡而公所首辟
縣宰熊君大經之弟之子也儒術吏事聞於公講於家

熟矣其來此善於其職行令事五月餘公廉明敏大得
譽於其民故予樂爲之書寶祐四年三月朔日迪功郎
新贛州司戶參軍歐陽某記

經訓堂記

廬陵歐陽氏聞天下謂之歐鄉族蕃甚旁出江以西數
郡然唐肅代以前皆出長沙長沙族今少廬陵而視他
郡尚蕃昔之未徙者也又有自廬陵復長沙者蓋江湖
地大牙入廬陵士溢出挾書常館數郡外視長沙江鄉

然至率見賓禮或遂寓居今二郡歐陽族不可盡辨予
廬陵族也寶祐癸丑夏四月始來長沙讀書嶽麓書院
有講書君諱新字仲齊者以高年篤學見推流輩見予來
甚喜數出講書業示余余心敬之問其先世次曰亦廬
陵族也徙宜春又徙瀏陽今又徙於此數世惟書一卷
故其徙也輕然吾有請於子自吾先祖以經訓名堂其
後家屢徙而先志不敢失今老矣又日以詔予子孫庶
幾其克紹也子爲我記之予茫然以思夫世次不可知

而同姓則皆曰宗宗人世守經訓美事也予於斯堂其
可無辭蓋敬諾君之請而未及作也會歲晏歸君遣子
必泰送予醴陵門外予別謂之曰還告尊公明年春三
月至償諾責矣至則後前期半月首訪君君即世矣予
哭盡一哀問曰適前半月也嗚呼予感昔人掛劍之義
忍忘君乎經訓堂君受之於父祖而貽之於子孫也請
予言以遺子孫如之何以君沒且已秋予又將歸乃記
之昔者太史公談且死語其子遷曰先周室之太史也

自唐虞以來世掌天官絕於予乎予死爾復爲太史以
卒予志遷泣而志之其後畢力討論之死無二起自黃
帝迄於麟止終能成一家言夫自重黎至於談遷綿百
世矣夫父子相語猶稱唐虞以來所掌古人懼墜先業
如此也後世俗衰遠論姓氏者或召訕侮不知數典忘
祖周天王感其陪臣孔子少時孟僖子屬其子曰聖人
之後也爾必往學禮蓋文獻之傳上有所因爲其後者
於此思之則知其身敬其身故世其業豈惟禰祖曾高

之近哉雖百世可也歐陽世遠矣自漢興先聖之書甫
出壁藏即以經師名家立於學官講於禁殿而父子祖
孫傳於儒林漢氏既衰斯文中喪涉唐武德正觀復起
率更令在諸儒間其文藝亦拔一時而名後世暨於文
忠公生遇聖代卓爲儒宗既以粹然經術佐天子致太
平而孫石之學曾蘇之文扶翼主張一於公是賴士到
於今受其賜也蓋自周衰至於今天下凡三治每一治
歐陽氏必以文學著聞雖不盡同而大較可見已嗚呼

天其特以斯文厚歐陽氏也與何千百年間先業之章
不墜也文忠公嘗碑世次上推漢唐皆出於一而予往
來江湖又喜業爲士者之多則夫記斯堂也而豈徒哉
昌黎韓文公教其子曰文章豈不貴經訓乃蓄畬公乃
爲此言世疑而非之也然能言經訓公亦異乎人之言
經矣訓也者親受聖人之訓已然也父祖有訓師保有
訓訓甚尊不可褻也世世子孫之讀經也無有師保如
臨父母委心聽命惟經之從則君命我作記之意不泯

矣

重建臨江太守彭公祠堂記

有宋寶祐三年歲在乙卯臨江重建前太守彭公祠堂
公諱合字子從官至朝請大夫累贈特進廬陵人也守
臨江始紹興十有七年再期而去於是百年之間之爲
守者且四五十不如公吾不敢議如公豈無人而郡人
惟公之思祠再燬再新之觀今之百年而後之永世無
數可知也臨江人道故老之言曰公未爲守時嘗爲清

江簿郡委受秋苗公以斗斛付民自槩隣州瑞若素胥
怨我不得爲彼民邪郡公以訴於監司暨爲守適有寬
詔舊賦皆放免倚閣而省部所催名色猶夥公以聞并
蠲之連歲旱又以聞減新賦大半遂發義倉糶客販以
活饑民漕司方責月椿錢急公移書告之更求資助清
江舊管鄉四與其一自新塗撥吏者而五其四秋苗耗
外責耗其一不然不然者通他邑皆不然也公曰是安
得偏受其害爲窮弊源則前時有司造簿附於正後人

不察而再加焉民大困又以聞得旨蠲如章四鄉至今
受其賜郡更兵火士應舉劣承平時舉額困損十有二
公勉諭士嚮應又以聞原額復是時東南粗安天子留
意民事公以一支郡數有奏請罷行害利惟日不足至
斷獄聽訟必計及風化嘗言長民者當一以文翁黃霸
卓茂魯恭為法使百姓有所觀感而禮義廉耻之俗興今見
於遺文溫然君子之言也公見德於其民以此予觀公
卒時魏國張忠獻公哭之哀謂公才宜用世而狹於所

施他年國史姑載公循吏傳以魏公之許可證臨江之
去思故老之傳皆實錄已雖然臨江之人知公臨江之
政宜也公去臨江守永使廣西去廣西使湖南最後以
尚書郎總六路賊所至皆有善政非臨江之人所與知
今予記公祠將牽連書之而不勝書也書其一二大節
使見公像者并見其爲人焉公自紹興初年改秩嘗以
邑最受知天子親錄姓名於屏風獨不肯少屈意當國
者秦檜相苟賤之夫往往旬月取通顯公一二十年間

奉祠待次之日居大半泊如也守永魏公謫居在焉檜
晚年伺遷客動息日甚稍與交際禍且不測公一無所
顧特爲魏公築室以便其奉親休暇或節序必移具勞
苦之魏公亦數從子孫與公遊刻石紀勝傳於遠近湖
南帥若監司有受檜密旨圖魏公者公之守此蓋蛇虎
搖毒磨牙必向之所其不并噬也幾希公非惟不避即
之益親魏公危跡藉以少安者蓋兩年餘天其以公爲
魏公地邪不然檜何患於無人守永也其後公以乙亥

六月去永而檜以是年十月死使其不死無根之獄已
羅織魏公則公亦安有免理蓋公不特厚魏公而於檜
所欲殺若李莊簡胡忠簡諸公皆厚矣天全諸公亦使
公并全公不畏禍而禍亦不及是可以爲世之君子勸
也公晚方持節納祿掛冠之意每形於言魏公父子屢
書止之朝廷欲藉公用奏至輒不聽其在湖南前執政
爲潭守甫至折盜足三十有二人皆罪不應死且案未
具公曰是不殺也國法無之豈以大臣出帥可淫刑以

送子憲臣也其謂斯何立具奏自劾其無所回屈類如此嗟乎臨江善政公緒餘也而豈無所本哉孔子稱剛毅木訥近仁公惟如此用能直遂本心以濟人利物世未有軟熟便佞多欲易怵之人而能流福澤於當世植風聲於方來也予生公里猶及見諸老遺墨自忠簡以來若周文忠楊文節皆推公前輩目爲鉅人元夫獨恨公事蹟於後生耳目未盡檢此而書之亦足以遺是邦君子之賢賢者所去見思猶有已也好是懿德無有已

也祠在封谿之上威惠廟吳聶侯神之右歲遠迹陳尚
或證予文而又新之十有二月甲子朔迪功郎新贛州
司戶參軍歐陽某記

袁州慈化院刻漏記

宜春郡南泉山慈化院僧道果作刻漏請記於廬陵歐
陽某某許之方隆暑未能秉筆僧五至請益勤座適有
他客問果曰爾之寺作刻漏何也今夫刻漏內自天子
之宮禁外至於朝廷百司若諸道州縣之治所莫不有

焉爲聽政也昧爽櫛冠平旦視朝以至於嚮晦入宴息不敢虛棄寸陰雖夜未央夜未艾而不知安枕之適此臨政者之事挈壺氏之職所以不可曠也爾之徒所爲晝夜有事者亦簡矣昏曉以鐘爲候既不啻足而又刻漏云乎哉鷄初鳴咸盥漱衣冠佩帶以適父母之所士之家禮禮也日出而作日入而息農之田業也昏明蚤夜之候固不必家有刻漏矣然而其事有常無先後時者爾之徒棄親從釋非有定省之嚴粥鼓齋魚聞聲而

食非有耕稼之苦而又何以刻漏爲也僧笑而應曰然誠無事乎此也抑是問也知刻漏之爲器矣夫刻漏則器也然吾昔者有悞入焉因作以示吾之徒云爾豈真謂昏明早夜之無辨而湏此哉客遂請其說僧曰作在我悟在人而焉用切言之雖然予亦有問乎君夫自子至亥謂之時自一至百謂之刻分之者天與抑人也宜然而運者天也何時與刻之知人則巧矣以一分之爲十二十二各分之爲八八而不能滿百又分之爲初初

是皆人實分之而天何與焉然而天冥然而運曾無一
息之差人巧矣而測度常失之眇忽是何也人之分是
時刻也豈不能以意爲之而又何爲取信於是器之水
夫水安知時之爲刻刻之爲一爲百哉然浮箭有常誰
爲之者君亦知之乎人惟巧故差水惟無情故信天之
冥然而運也水之升降流注也其無情一也嗚呼孰謂
有情而無情者有情而無情天且不遠矣君無於我乎
問也君其問諸水某忻然而作曰予不能作記爾之言

亦可書也吾爲爾書是爲記

存存齋記

安成蕭君次膺名其齋曰存以告東山先生楊公揚公增二字曰存存而爲書其扁後二十餘年蕭君求予文以爲記且諗予曰子謂存存何以異於存也予以所見對曰操存人也存存天也君有志於存楊公告君以存存豈謂存之上又有所謂存哉請言存存存存猶生生也凡天下之物生必有死存必有亡苟存必有亡苟麗於

形無不歸於壞滅不曰生死而曰生生不曰存亡而曰
存存則豈非不壞不滅者哉而誰能識之聖人指以示
人曰生生之謂易曰成性存存生生之生不與死對存
存之存不與亡對識易之所謂生生則知性之所謂存
存矣水在地中不以掘井而有不以廢井而無故曰无
喪无得往來井井日月在天不以人所見而見不以人
所不見而隱故曰日月有明容光必照焉比存也朱呂
二先生編近思錄首卷示人以道體而後及凡爲學之

事然則從事於操存者苟不先明乎存存之本體則雖
曰操存無乃外襲取之以極力控持為能哉君日處
是齋而思道義無不一出於成性以為固有以為當然
以為不可須臾離則於楊公所以詔君固自得於意言
之表是為記

巽齋文集卷十五

欽定四庫全書

巽齋文集卷十六

宋 歐陽守道 撰

記

靈佑廟記

勅賜靈佑廟威顯善利靈應英烈王神姓康諱保裔國
初北邊名將也父諱再遇從太祖征澤潞死太行山下
鄉民廟其所王在後周即有戰功入本朝連守數州最
後以彰國節爲高陽關都部署遇契丹入寇范廷召自

中山分兵迎擊來求援王領兵赴之日已暮約詰朝戰是夕廷召遁質明敵騎獨圍王數重左右請易甲以逃王曰臨難無苟免此吾效死日也大呼決戰數十合矢盡至以弩擊殺傷甚衆遂死之事聞真宗震悼優詔贈侍中王有母年八十有四矣即遣內司賓勞問封陳國太夫人妻薛氏先卒追封河東郡夫人子繼英自供奉官授六宅使順州刺史繼彬繼明繼宗及孫悉加寵秩諸子感泣謝伏地不能起上惻然慰勞且顧左右以其

父子兩世戰沒嗟惜之事見國史咸平三年距今淳祐
戊申二百五十年矣赫赫若前日事也王洛陽人死於
河間大江之南馬跡不及而南渡以後威靈著於茲土
豈其平生徇國死有餘忠中州旣經靖康之難人謀不
臧而收復無日則其英魂毅魄固將視衣冠所在而依
之耶朝家懷柔百神所在郡邑有以王之封號爲請皆
即日報可自王之身以及父母妻子命書稠疊恩數甚
盛以死勤事之報至於今未已嗚呼盛矣非爲其但以

禍福驚動世人也廬陵屬邑皆有王之別廟遠近人士
歲時走集莫敢違寧然其所以事神往往知畏而不知
敬造妖襲訛日新月盛甚專以司疫冠其徽稱蓋無復
知有王之平生者江南巫鬼自昔已然王重不幸以其
凜凜不磨之忠乃見擠於伯強之列薦享黷慢罔有馨
香則有荷校赭衣自爲繫囚巫操其權禁貫在口有敢
出一語證其理之不然巫之黨戰戰相恐若謂禍且立
至何辜斯人神願樂於立威如此哉推原所以蓋學士

大夫未有考信方冊誦言王之平生是以蚩蚩之氓震
於妖訛莫之或止竊嘗論之人神一也易言原始反終
故知死生之說精氣爲物游魂爲變是故知鬼神之情
狀鬼神未易知也吾且一死生物變而觀之則今之不
可度思者昔之與我同類者也人之生也動天地感鬼
神惟一念及其歿也超太清役萬化亦一念王以戰歿之
身不殞先烈於家爲孝子於國爲忠臣一念之正上帝
臨之是用界命爲神使主下土禦菑捍患以宏庇於生人

今雖杳在冥漠此念豈有異於平生哉且王爲人謹厚謙退好禮崇儒及其捐軀殉義乃卓然有立如此此與前史所稱張巡段秀實何異有識之士試以是思之盛德之容尚可想見不然則陰威慘烈之氣象是固繪畫之士所假以震眩流俗者展轉怪妄其亦何所不至今之所以事神亦可謂一國俱若病狂者矣厚誣之極吾意王亦厭之氣志之動不得不假手於人而息邪說正人心是在有人民社稷者之職分豫章李侯某奉詔守

郡間以民事禱於神明言出應隨如響斯答嘗與郡人
歐陽某從容言曰古人爲政兼理神人未嘗如後世析
之以爲二也他日聞王有廟於此而祀事不經滋甚慨
然悼王節之昧昧與斯人之蔽蒙如前所云旣式過之
爰命某作記祠下偉此一舉契於神心某拜手稽首旣
取國史所載而刻之石而終之曰賢太守加惠此邦至
矣流俗未易曉也是邦逢掖居此屋十之三守正不回
化俗而不爲俗化者非所望於斯人邪夫物怪神姦理

之反常惟至於知天者無所惑札瘥疵癘氣之失正惟學至於立命者無所懼且懼妄庸人爾理則無是又況王之忠孝凡有人心之所共敬雖微驚動斯人之禍福猶將百世祀之入此廟者欽仰高風景行行止是則有以媚於神而亦我國家崇明祀詔方來之意乃有不吉不迪獲罪於天與民彛神不爾囚爾亦無所逃於天地之間某文字不工無以發明王之盛德獨念賢太守開釋流俗之意首告於是邦有識之士以致之民間闔下

里之惑之懼自此其有瘳乎不然不惟無救又從史之
無責乎爾則亦無責乎爾六月某日謹記

歐陽監丞祠堂記

靖康建炎間廬陵郡死國事者二人歐陽公死燕山忠
襄公死金陵死一爾有異焉楊公死城歐陽公死使命
死城故事平得即祠其所死使命故無所於祠豈惟無所
於祠雖所居鄉未之祠也茲大闕典百十有六年其從
孫文龍始得地於慧燈寺之旁屋之率宗人俎豆焉書

遺余願有以記有謂余曰歐陽公誠死使命與致命於敵國不從我死之義也公之往也吾國則有辭矣敵讎方熾京師方急三鎮雖天下根本不敢愛也以是紆禍且爲後圖公奉命割地可也既至深軍民固守不下公知人心未解即反其辭告之曰朝廷爲奸臣誤至此若忠義報國吾已辦一死矣敵盛怒執殺之謂違使命以死非死使命也義與余曰公得死尚何言當崇政殿之間淵聖非決有棄地意公亦力言不可且謂戰敗而失

其地它曰我師取之直舉以與之它曰我師取之曲時
宰既詆其說又強以行大類漢遺狄山乘障事事不出
武帝而出張湯爾使公竟致使命不死矣而豈公夙心
哉當其慷慨城下痛哭以勉守者但見有吾心不見有
使命也此時宰之命非君父之命此君父之命非宗廟
社稷之命也臣受命於君君受命於宗廟社稷揚揚出
疆舉地以與人曰有使命在吾爲宗廟社稷懼矣使皆
類此一隸可辨何以知義之士大夫爲古語有之爲人

臣而不通春秋之義守經事而不知其宜遭變事而不知其權故曰大夫出疆有可以安國家社稷則專之當時人心如此使所在皆固守不可其紆禍不猶愈於割地邪況不可割吾前言邪夫前言忤時宰意一宜死知不可顧不得已爲此來二宜死固守不下何人今搖之使背國歸敵予何人三宜死死而死爾萬一覲吾地之存夫義無定名要於忠忠不在小諒歸於爲國公得死尚何言公諱珣字全美郡之永和人登崇寧五年進士

乙科歷仕忠州教授知杭州鹽官縣罷起授南軍司錄
以監司薦如京師遇國難及出使秩朝請郎加將作監
丞公有子袞夭而不嗣紹興中上錄公大節官其壻臨
江曾敏敬恭敬恭故曾爲祠於其里之薦福寺今像則
丈龍從寺識之堂旣成尚謀結屋於左右使子孫讀書
其中而奉其祀故鄉之好義者出力以助而州家亦可
補其不逮是可以觀人心矣嗚呼公死何地公像在此
公子爲誰公也世有祠今其地址通達面大江停車簔

舟顧瞻而徘徊者尚其念曰人誰無死

廬陵貢士莊記

廬陵縣貢士莊者郡太守豫章李侯某從邑人劉君某之請所建也郡三歲貢士六十有八人而廬陵得人爲最凡申舉於監於漕若以前舉免者俱上春官率不下百數他縣貢各有莊廬陵獨無有至是歲得米三千斛有奇郡博士偕邑大夫眠其入及期易爲泉眠其人分贍之既奏名集英對亦如之或試國子監與選爲諸生

亦如之各有差士相慶出望外而屬某爲記某不得辭請
於侯問所以蓋劉君之子芮得田於宣溪王氏之甥館
未幾悼亡以田質之能文法者屬之劉乎屬之王乎曰
屬之劉哉芮曰已矣吾奈何有斯田也君亦曰已矣吾
奈何使吾子有斯田也則遂詔芮曰女安食課進士業
亦知士之貧乎士與貢亦榮矣然出門惘惘有道路羈
窮之憂今聞郡有賢侯節用而甚愛士郡博士爲諸生
與貢者建莊侯斥已所宜得畀之學蓋歸之乎芮曰敬

奉教君疏於侯侯曰賢哉劉君已可有而不可賢哉劉君於是又建莊於郡庠之東以帑待士之籍廬陵者爲屋若干立規約刻石植之廡士以德君君曰非我也郡也郡倡而我和他士曰信噫君非侯孰倡侯非君孰相蓋兩德之某幸聞其槩於郡又聞君所以對士者則爲之辭曰漢自董仲舒對策請諸列侯郡守二千石歲貢吏民之賢者各二人既而吏民有明世務習經術縣次續食令與計偕漢待士良厚嘗以此意求之周周制三

歲大比鄉大夫考德行道藝而興賢者能者以禮賓之
諸侯歲貢士於天子六鄉之士由其家至大夫之庭登
名天府官使於朝其往來資遣當有厚於漢而無傳焉
至若貢自諸侯之國則道里相去又非畿內比矣曾未
聞如漢所謂續食何故吾意漢無常制故曰詔下始爲
令周有常制故不待賓興歲貢然後爲之所也按周賓
禮甚詳凡侯國還職若遣其臣請命於天子其入意皆
用賓禮而賢能謂之賓興當周盛時侯國館舍具修在

六鄉則待以郊里之委積十里有廬三十里有宿五十里有市自飲食以往皆具焉鄭司農證以漢法曰廬若今候宿若今亭蓋漢所謂縣次者縣其總而次則候若亭也然則漢亦倣周而已矣不然安有賓士以禮乃不以待賓於路者待之與唐世最重進士科州刺史資遣今不盡見然其末年鎮南節度一武夫耳猶能歲舉鄉貢故事資以齋裝士不遠千里走其府推此可以想見其盛時矣士由鄉國而貢於上官子道里費漢與唐皆

然雖周亦然江西爲士淵林異時不遠千里走鎮南即
此道之士吾廬陵又淵之深林之茂者其產士富甚而
續食齋裝之助曾漢唐故事之未講此三歲奉詔者所
當念也李侯一開其端劉君若不約而合意氣相感固
應有此或曰侯分銅虎符爲郡身在外乃心罔不在王
室今國事殷調度日不繼侯內撫其民外應餉運朝夕
劬劬靡有遺力劉君不有其田而歸之郡賢矣體侯之
意而用之於所急不尤賢與何貢士莊之助之亟也某

應之曰有是哉堂堂天朝自公卿大夫士議論勤顧國體異哉子之言也夫郡爲國貢士雖特出帑廩資其行其誰曰不可況田固劉氏所得有出於其意之所欲助者乎子謂今多事時也請有以曉子王猛偏方之臣也崎嶇兵革間拔幽滯顯才能自長安至諸州亭驛皆有旅行取給之備英彥雲集國人歌之彼何時哉而猶所重在此今世運文明每取士則命郡守身為勸駕郡守有土爲政不爲天子激昂士氣使厄於道路無以致身

闕廷而曰是事緩吾圖其他則亦昧於輕重先後之宜
矣尤非所以待李侯也既以折或者乃備書之石侯曰
吾聞劉君好士而勇於誼今惠顧同里士君無德色而
守何德雖然士一名一第秋毫以上孰非天子賜守與
劉君皆無德焉可也因併記其語以告來者年月日某
記

復齋記

昔者夫子讀詩至於高山仰止景行行止歎作者好仁

之甚以爲忘身之老不知年數之不足也夫子何以知其人之如此哉即其慕望之心日有孜孜必求仁以終其身者是以深有味於其言也復齋羅君求予記其齋於是君年八十有五矣予以君之耄老儻不杜門却掃金玉厥音則後生小子得聞一言固所願也而何爲反求記於余旣遜謝久之而君屢言不止最後曰子庶幾及見子之記重愧之蓋諷詠夫子讀詩之彌日嗟乎即此所以幸教我後生小子者非耶然予嘗有疑於今之

言復者類以爲人欲天理消長之交也而予觀之天地之心則有不然者夫天地生生之心謂之仁人生而得之以爲心也大化之運晝夜寒暑相循於無窮往者過來者續本無間斷人以其消息進退之節分之則今日之終次日之始今歲之終次歲之始於此有所謂復焉易曰復其見天地之心乎謂天地之心密運人有所不能窺惟於此時生生不息之機最爲明著故可得而見也此所謂仁也豈以旣復而有仁未復而常有不仁哉

今以理欲消長之交言復則亦異於天地之心矣夫日之時十有二歲之月十有二十有二之中復居一焉而爲靜動之會若以天地本心全體言之則元亨利貞蓋無一息非然也聖人爲夫不知此理者使於復時觀之如其知之則元亨利貞皆天地之心矣而何獨復哉彼以理欲消長之交言復者其於元亨利貞何以配之日之暮而夜也歲之秋而冬也將以爲天地有不仁焉可乎或曰信斯言也人於天地宜無不相似者人之有不

仁也奈何曰一日之間容有晷靈一歲之間容有乖沴
非陰陽正理之所本有也人之不仁亦豈其所本有哉
天地之復以夜旦冬春之端論不以晷靈而開明乖沴而
復常者論人欲天理消長之交比之晷靈而開明乖沴
而復常則可比之夜旦冬春靜動之端則予於此理自
信久矣不知復齋以爲何如也復齋老矣年有壯老心
無今昔孟子曰大人者不失其赤子之心者也復齋自
少壯以至於今更嘗經歷事變幾何而好仁之心本夫

生而有之者終身而無所已予之齒僅半何足以知君
即其名齋之意推之足以當夫子所謂詩之好仁者夫
今之名齋者往往不襲前人特自標異不必皆因名踐
實也而齋之名復前人屢有之大儒先生爲之記亦多
矣君非不知而不厭其襲乃所以爲有真見也與予是
以敬記之書扁者前太守豐城李侯某侯力學篤行尚
友前哲而雅敬君甚則君可知也已君鄉先生歸愚子
諱泌之子名革字華叔年月日某記

青雲峰書院記

曲江嶺南名郡山川之產多秀民自張子壽顯開元余
安道鳴慶歷文獻承承越至於今業進士者有企慕前
修之意求師取友走千百里外或累歲而后還家江湖
間有以所學教授其徒曲江士必在列而歲至吾廬陵
者尤衆其人大率純實茂作爲文章輕巧不足而質實
有餘予甚愛其有古之遺風使遇名師良友以古道相
誘掖其所成就宜有大絕人者然近歲士習趨下號稱

前輩者或亦止於傳習場屋之文謾不省講學爲何事
卒而收科自謂一第如探囊中物不復增益其所未能
後學效之凡書肆所售謂之時文空囊市去如獲至寶
而聖賢格言大訓先儒所爲孳孳講切以覺人心者反
棄置之以爲非舉子日力暇到自吾里中士不免病此
他郡之來學者何譏焉是徒使其不遠千里而來非惟
無益而又害之也予解褐且六年追念半生學力無幾
每每發憤太息塾於私家思與二三同志專意從事於

所當學然至者認科第爲的則亦惟索我於所亟用之
時文以予筆硯代耕猶未得自脫於區區之故技彼已
不相益而相習未嘗不怛然內疚於心也歲在丙午鄒
君某與其弟某實來君曲江之屬邑仁化人銳意就學
惜其與處纔數月未及以予所見諭之君將歸請於余
曰予家有青雲峰書院因地爲名蓋青雲峰之下爲龍
骨嶺書院席龍骨而枕青雲前有水焉挹書院而東謂之
斗水伯父愛其幽勝屋於斯以爲諸子藏修游息之所

而予父共成之買田其中收其歲入專以給游學之書費願爲記之且幸教以爲學之大方庶幾朝夕目擊而無忘執事之訓也已予告之曰凡予所願與朋友共學者非今所謂舉子之文之謂也學也者因聖賢之書求聖賢之心而爲聖賢歸者也舉子之文不過求先達準繩尺度學先達之文足以得先達之科第而已矣讀聖賢之書求聖賢之所以爲聖賢也孰禦焉予知子之嗜學也而恨數月之間未有以告子今且別忍愛言哉子

之書院取名於山山之聳秀峭拔之狀非予所觀也觀
其名知其非丘垤也子歸而藏修游息於聳秀峭拔之
山之下地之偏人之寂景與心會能無感乎詩曰高山
仰止高山之可仰何也人固貴乎自拔也孔子登東山
而小魯登泰山而小天下何也居高則所見者大也人
不自拔則陷於污不見其大則安於陋子行矣子無以
告子矣子歸見是峰而問焉君又請曰峯以青雲名決
科者以爲祥也予兄弟學於此謂天之衢亨在此矣揭

斯名也亦以動策勵之心焉何如予曰培塿堆阜不能
出雲出雲者必勢分積高且大也夫學亦然集義以養
吾氣是氣塞乎天地而天下事有不足爲古之君子退
然自養不求聞達一日見於用而天下被其澤何也藏
之深而蓄之厚也子行矣子無以告子矣子歸見是峰
之雲而問焉君曰唯唯因次第其語爲記

嘉蓮亭記

歲辛亥秋八月朔予從二三子訪友人胡君伯雨於永

水之陽古潭之上主人未出予以曉涼徑造溪東之園
溪水之旁故導水爲池至是築小亭焉工方治水予問
工何以亭也曰旌嘉蓮也今夏蓮一幹而二花者再俱
實矣指以示予二三子請於予曰何爲其然哉濂溪先
生所謂淨植亭亭不蔓不支者今乃出此奇乎予曰子
未讀吾家六一公所記許子春園亭乎六一公謂見子
春家孝悌三世矣園之草木將有連理而駢枝禽鳥翔
集其間將不爭巢而棲不擇子而哺也許氏之園未有

茲瑞也六一公以其孝悌意之而已今也誠有茲瑞此豈偶然哉夫伯雨之有此園也予未論茲花之爲瑞大槩伯雨蓋有樂乎此也孟子有言賢者而後樂此不賢者雖有此不樂也今夫動植之類皆足以使人觸目興感而油然於父子兄弟之天詩之興是也草木忻榮鳥獸和鳴而人之胷中無生意以受之安知境之可樂所貴乎君子之樂以其胸中浩然與天俱春是以森然於吾前者即其充然乎吾心者也予每從伯雨徜徉茲園

見園之所有生意類與人同窺伯雨所得於眉睫間心知伯雨之有樂也二三子其謂人心之所最樂何樂乎樂莫樂於人道之盡分父子兄弟孝慈悌友推而放之無所不準此分不盡吾安得無憂此分而盡吾何爲不樂樂則生生則忘可已矣天地萬物與吾心一也予知伯雨之胸中而不能一以告子子欲徵吾言乎予之知伯雨也不如蓮蓮植物也而一再為伯雨呈瑞若特有意焉者鍾和毓秀是誰爲之然則理氣感通之說由詩書

以來焉可誣也語將旣伯雨諸子偕其諸父昆弟至詢
予言之本末予亦自謂予言胡氏子孫宜共聞也復具
告之且使白於伯雨而刻之是歲淳祐十一年歐陽某
記

逸老堂記

禾川勝溪仙臺之下有逸老焉曰張君以名其堂或問
堂名於予曰天逸張君以老與曰天不能逸人張君老
而後逸與曰勞逸無壯老曷謂天不能逸人曰天雖逸

人人自勞之天安得逸之血氣盛時騁其雄心擾擾無
晷刻息天安得使之逸及其老而稍已者血氣衰焉耳
曷謂勞逸無壯老曰固有少而逸者有所見也固有老
愈勞者戒之在得而不戒也夫人之精神有限而富貴
外物世之更相羨慕者無窮以有限之精神沒無窮之
進取則於是又有未老而先衰者矣而其所成終亦何
有故曰天不能逸人勞逸無壯老嗚呼予視世之如此
者多矣嘗試喻之天地之間峙者爲山流者爲川自開

關於今矣欲登高乎則山也可欲臨深乎則川也可今
築臺以爲高鑿池以爲深臺豈復高於山池豈復深於
川也哉然世往往爲之皆不自逸者也吾不求登臨之
樂於臺池求登臨之樂於天之山川則焉往而不逸故
凡勞我者舉非天也予雖壯年而知此亦久矣今張君
年踰九十聞其視明聽聰讀書如後生此豈無所得而
然哉書曰作德心逸日休德者有所得而足乎已也至
足在此而又奚求壯老一逸日見其休矣是謂康寧是

謂攸好德康寧而壽張君字伯英予蓋識其孫肖玉云

巽齋文集卷十六

欽定四庫全書

巽齋文集卷十七

宋 歐陽守道 撰

記

螺山靈泉院記

環廬陵十里佛寺萃於西南而東北特少出東門循江
左達於吉水巋然一螺山靈泉院爾佛寺相望或以爲
民蠹至於相去絕遠則有山也無與養茂林有泉也無
與疏清流山困於樵牧水汙於畝澮而一憇之清一酌

之甘有不可得況望登臨遊賞供耳目之清致哉然則
佛寺間見於村墟煙火之外亦好事者之所快也螺山
者宛委如螺掘地不盈尺輒得金螺無數大僅如珠而
形奪真其南有井深不盈四尺清潔甘寒冬夏不竭泉
旁有塔塔旁有寺是謂靈泉予暇日數造焉識其主僧
曰元鑑鑑請於予曰予寺之創相傳始於東晉升平自
今日等而上之元鑑之師曰妙心妙心之師曰惟本惟
本之師曰宗海四世相傳一以修造莊嚴爲事蓋鼎新

佛殿海也重建法堂本也梵徑路建山門定光佛殿心與
鑑也今又度弟子四人矣使吾弟子之於我又如我之
於先師敝者葺之闕者增之則茲寺與茲山茲泉遂當
爲城東北之勝然寺自始創至今無片碑幸爲我作記
且以告後之人予笑曰寺豈託碑以久乎升平者東晉
穆帝之末年也元年歲在丁巳盡五年止自元年至於
今寶祐四年丙辰得四十丁巳蓋九百年矣九百年基
址如故天壤間如此者幾何蓋上自天子離宮次而王

侯別墅以至雄藩巨鎮之觀游通津要路之館驛計其
占山水之勝極棟宇之麗用意之初豈不欲貽之無窮而
其記述題詠出於名筆者何限然遺迹之存百不一二
弔古之士訪求於黍稷茨棘間而不得幸而得其石刻
於野人則磯漁梁礪樵斧之餘亦往往斷裂磨滅矣蓋
土木與翰墨兩不足恃如此爾所謂區區之寺當彼盛
麗之時誰復比數哉而存至於今何也立不足爭之所
也天下之至寶莫大乎世人之所不爭世人之不爭者

世外之人乃常得而擅有之宜乎彼有記述題詠而無
救於速壞此無片碑而無害於久存也鑑曰善哉君言
乃契於吾佛雖然吾久具石以候君矣願即斯言書之使
凡讀之者悵然永慨而於得喪少有警焉舍愛離癡或
因君之言則一言功德乃勝於我修造莊嚴百千萬億
分子曰諾是爲螺山靈泉院記

圓通閣記

佛之道儒者難言之一人佛言衆誦且排爲是置不復

詰億佛書具在昔者先儒目力往往及之矣目力未知
之及而衆誚且排之逆畏予不知其說也故不若相與
究乖合之極而折之以公昔者予聞先儒之說西方氣
厚故生異人又曰佛書遠勝莊子蓋欲取而觀之久矣
恨其徒偽益其師之說使部帙猥多以眩惑流俗今年
春僧法榮者以所造圓通閣成求文以記之予惟圓通
二字之義圓者無滯通者無塞此其說未有戾於吾黨
也則遂取所謂首楞嚴經者讀之既而歎曰彼師弟之

間難疑反復毫釐之差有所必辨是亦非苟然者焉用
遽非之蓋其徒所稱阿難者本釋迦氏之弟慕其兄之
學而學焉兄弟之間談說圓通一時在會者因各言所
得凡二十有五人而觀世音獨推其初實自聞入聞之
說出二十有五人者莫不恍然自失也所謂聞者以聲
爲塵以聞爲性聲塵有起滅聞性無存亡曰本聞曰聞
復曰自聞曰反聞歛之爲凝寂散之爲光明夫是以上
合諸佛與諸佛同一慈力下合衆生與衆生同一悲仰

語雖幻異然其寂感之大歸亦可睹矣彼又以爲聞也者不依形而立故不待生而存不隨死而亡此則佛之所以爲佛而吾儒之所不屑究言也然先正猶一言之曰聚體知死之不亡者可與言性此又豈以佛嘗言之而不肯與之同邪是則無感者性之體能感者性之神循有感以求無感大虛至靜粲然吾前矣使佛氏而不知此固無足論佛氏而知此則亦豈不足驗此理之所同哉雖然彼所得者在不依形以立而所失者亦不依

形以立也謂其不依形以立而遂指身爲幻一無所事
焉則理有大不然者矣法榮佛者吾亦未暇與之盡言
也嗟乎法榮能建圓通閣矣爾以爾師所言圓通者爲
何義邪閣中位觀世音像而嚴事之爾以爲觀世音者
得其所得有不堅志精思而不能忘此邪嗚呼焉用彼
之問予方重有感也閣在永樂寺寺在梅山山在廬陵
縣儒行鄉予之先祖墓三世與之鄰云主是寺者本銓
榮其徒也

容安書院記

安成王君貴珏扁其居室曰容安而以書求文爲記其書曰珏之初意非取於陶靖節容膝易安之義也予得書盡一日不能曉蓋思索載籍中二字連文者他無之王君豈有所祖而予未之知乎予將復書徵其所自又念往復滋多事姑率意言之以塞予責夫靖節容膝易安之語自是無求者也而予又得一語於東坡蘇公曰人之所履者容足之外皆爲無用之地而不可廢也故

慮不在十里之外則患在几席之下矣蘇公特主於遠慮然安危之理在焉有味乎其言哉予將借之而言予所謂容之說蓋予所謂容非靖節所謂容膝亦非東坡所謂容足而東坡意則近於予之所欲言也夫所謂容者予欲使之有餘地也尺寸之地自謂至安而無餘地以優其容則安者危矣故君宅心坦夷接物和易所以利人者乃所以利已也左崖右岸前機後甯置人於至險而自立於尺寸其安幾何秦穆公言其心休休其有

容則能保子孫黎民亦職有利哉其不能容者不能保
我子孫黎民亦曰殆哉此宅心接物廣狹安危之分也
予請以是爲王君堂記雖然容則安不容則危固也然
予尚有以進王君秦誓所謂容謂不能容人之有技與
彥聖者也善惡在前畧無剖判而曰吾優爲之容則不
可人之不善君子固有以待之矣其冠不正望望然去
之隘也袒裼裸裎於我側焉能浼我不恭也隘之患不
過疾人之不爲善耳不恭之患則已爲人而不以人類

待人此豈可哉君子於人無所不容雖不善亦容之然其容之也將使入吾之并邑而熟吾之誘化有忠惻之心焉彼已胥入於善則彼已亦胥處於安矣不然容且有弊何安之有君試思之

登雲莊記

乙丑初冬予與二三子適於野遇輸官租者盈道予前至一田舍憇焉餘粒在地一童子掃而拾之蓋輸租者之居也壁間有詩曰雲兮雲兮變化有神靈兮捲起地下

黃飛去天上青兮仙人乘雲天尺五借我清陰覆赤土
雲間逍遙人間苦年年苦時望君雨予問童子誰題此
詩對曰廬陵縣有登雲莊田吾翁與鄉隣耕之此詩吾
翁作也問爾亦曉此乎童子不對仰瞻雲而歌之其聲
婉轉悠揚予爲之感動顧二三子曰識之此我輩人語
也他日令君鄱陽熊侯訪予語及登雲莊予以所見詩
告侯驚焉曰是語俚其意長所望於庇民之君子豈淺
乎震龍初領此邑知學有貢士莊以市量計田租八十

有七斛爾嘉熙間前宰永嘉項公模所勸謝公子強稍
增之意美矣而田少即動心曰使得終三年去吾力尚
可拓此於是錙銖累積得錢一千餘緡以買田歲復收
租九十八斛有奇一道士以屯田二十解獻視其意無
他且爲數也微遂収之而附焉郡國貢士縣續食漢法
也今士出鄰境莫我肯恤爲令者自以區區致吾意米
又重不可負則易錢而藏之士將行發新舊莊三歲之
藏而分贍焉諸貢於鄉於漕於曹監者若往年嘗貢而

再上春官者若階對者其數有差而嘗有籍於吾學則
加優學之前廊司其出納今年春嘗一贐矣名今莊曰
登雲別於前莊且示相期也然吾意彼田舍翁知之矣
予因請於侯曰士受侯賜甚厚顧以米易錢歲無常直
米賤錢少米貴錢多爲贐貢士計者幸其貴而多乎抑
寧賤而少乎侯太息曰吾固嘗以語此於學之士也去
年民艱食邑無廩可發獨有此二莊耳不能待此區區
者以贐士欲亟借此區區者以賙民賙於此無以贐於

彼則視時之宜姑損其半而出之損微而施狹矣吏猶疑而告曰若爾來年得贍之士將患少吾視吏不足語語於學之士曰今茲爲我積錢明年受此贍者必諸君也諸君得志宜有膏澤下於民且行時豈自一錢以上盡爲爨桂炊玉資哉乞我新豐一酌之餘分彼翳桑一餉之飽諒與我同此心夫直雖損時之半較之豐歲猶贏也吾黨豈幸直之貴者乎則皆欣然曰諸生若竊第入仕損已益民可也焉有妄擬公家之賜以爲已有而

計較多少乎夫此一舉而士與民兩利焉則其勢自相維持而無弊請自今日永爲後法吾祝贊之曰諸君皆志士仁人也天心至仁諸君此志當天心矣高科非諸君而誰此吾去年以二莊平糶之始也子爲我記之子遂爲之記曰士之用心常如所以對侯是無負於登雲名莊之意我輩田舍翁真有望於斯人矣咸淳元年十月丙寅邑人歐陽某記

吉州吉水縣存濟莊記

予觀郡縣年饑勸糶之令何嘗不太息哉積米之終歸
於糶富而仁者亦不待勸官於荒政類亡具也而勸糶
爲第一策當其未講行之先貧者持錢告糶猶有所也
富者視時增直猶有漸也令一出立異矣夫富非一槩
甚富之謂勸之糶者雖僅僅自給之家亦與焉彼生理
索薄計口而食之外猶有餘糧未有不以易錢雖欲待
價不能待也官呼而諭之曰爾糶數若干以某月某日
違吾令罪爾歸則相戒曰吾雖有米今不可自糶矣自

糶而一空如其無以應官命且奈何昨者糶今者閉不得已也又有名雖爲富而米實無餘者以情告而官不信也縱信之則諭之曰爾不足於米而有餘於錢如之何可免承命而退趨而就積米之家糶而爲之備不敢後他人也轉糶爭先而積米者執增直之權以要之暮視旦不同矣大率此令常在冬春之交而行之於六七十日之後已令未行之間官與富者爲擾擾而貧者受閉糶之害受增直之害二害皆官趣之及糶之日直愈

高而不可復下雖強爲裁抑無救也又有行之猝遽而
立取辦者數之貧弱而不堪命者一切聽於吏而奸欺
百出矣嗟乎此得謂之荒政乎夫此勸糶也於古未聞
吾聞勸分矣今則詔勸糶爲勸分也然則勸分何如曰
仁哉國家之政勸分素有良法也正賦什取一之外又
伯取一焉謂之義米是富者無歉歲歲皆分也無
仁無不仁人人皆分也無勸之名有分之實正賦十萬
貯之義倉不爲不多矣而又非歲歲常發也饑而後一

發第以與貧者而不取直耳與之者誰此米得之富者
富者與之也長民者不推原置倉之初意而有時取直
焉則是富者本以分惠而官乃同之正賦而有之何謂
義米乎歲饑再以勸糶爲勸分富者得無辭於官乎而
況勸糶之害如彼又不重不利於貧者乎嗚呼盍亦反
其本矣三山陳昇之爲吉水也連年值歉蓋嘗以例勸
糶而睹其害也慨然曰義倉非縣得專使縣得專吾勸
糶爲吾黨他日可專之則吾自以分之而不取直約而

計之使吾日分一斛則彼饑人之日食二升者可五十
人也有千斛五萬人得一日之飽矣吾恨力不及此萬
一亦幸邑未至有五萬人之當濟吾且開其端後有君
子因吾所爲而增益之濟固無筭也適有邑所得之
田又節費而賈益之歲收租可四百斛若日濟二萬人
一日而盡人減十之九旬日而盡若夫天相吾邑家粗
給人粗足待濟者少則米支一月未可知之又幸而多
豐少歉數年而後一發所濟益加衆矣今施固未博也

於是名其莊曰存濟莊以寓其心焉邑之士民胥請記於某曰陳君所謂存濟及物於人必有所濟者乎予曰身無病而以藥施人病者得愈藥之者爲之體康不自飲而以酒飲之者爲之酣適侯見人饑於前則食不下咽饑者得飽則侯之甘食此有快於心無德於色者也記非侯意雖然予欲談勸糴之害於有官君子久矣微侯此舉以發予之鬱積後之覽者儻有感於斯文其能遂如侯之望因是莊而增益之乎何獨吉水賢大夫之

凡爲邑者其必有倣而爲之也咸淳四年月正元日承
事郎主簿華州雲臺觀歐陽某記

龍須山旃檀林記

龍須山法雲禪寺有堂曰旃檀林在佛殿西以待其徒
之自遠方來者景定三年春主山樸庵紹月撤舊新之
屬予爲記余聞旃檀異國之名香佛屢稱之其曰以赤
旃檀作諸殿堂高廣嚴好百千比丘於其中止謂此香
木之可以立僧廬也而諸佛中亦有旃檀香如來之號

則取其道行清潔與此香同故以爲名證諸楚辭以香草比君子而處之桂棟蘭橈之室同一意也夫佛亦寓言耳舍其王位而自甘於寂寞無人之境彼豈復以宮室之美累心然自其教入中國昧者得其莊嚴供養之說造寺奉僧極其侈靡使中國多得此木亦必舉以爲其所謂殿堂矣農夫細民蓬茅不足以自蔽王公大人未有以動其心者獨於奉僧則不靳也而僧之安居華屋亦若固有之嗟夫佛之初意其果然耶好潔惡穢人

之同居處所以安身至於潔而止若夫齋戒薰沐使其
表裏清淨無垢則佛之所以教其徒亦猶吾儒之所謂
潔其身者明德之有馨香果在內不在外也紹月之語
予曰草木猶愛臭味之同吾林下人自謂曰芟蕪而以
旃檀林奉客所望於來者厚矣衆如林然皆我氣類勿
有間之與善人居久而與之俱化者也予於是慨然有
感矣是山予之先塋在焉展省松楸之餘入方丈見此
老母覺清言有味繼今又當時造茲堂庶幾遇其自遠

方來者以觀此老者之所與友

潭州湘陰縣學記

湘陰長沙之屬邑在全楚南境之僻遠處也吾夫子轍
環天下楚之君亦有意聘焉爲子西所止狂接輿歌而
過夫子曰鳳兮鳳兮何德之衰當是時楚於天下幾盡有
南方而先聖之教不得行乎其國況乎今之所謂湘陰
望其國都猶千百里豈知東魯之有吾夫子哉然楚國
自有豪傑之士如陳良者尊慕夫子之道於百年之後

而湘陰則汨羅之水在焉屈平死忠邑人至今能指其
處君子讀離騷而哀之謂使平學於北方則制行又當
有合乎中庸然則夫子存時雖聖教不得行乎此而其
地其人雖去聖千載可與爲顏曾可與爲游夏與洙泗
間一也宋興海內一統慶歷中詔郡邑皆立學湘陰學
建於元祐遷於崇寧復於淳熙景定五年趙侯與縱又
一新之蓋舊學濱江水潦所及又基址迫隘介乎館驛
民廛之間屋朽而歌不修且壞故盡撤而改爲築之使

高拓之使廣侯有不容已者學成而祭器俱新悉從禮制近年邑有主學命於朝侯又相攸以營其居焉夫道之興廢先聖不能必子衿刺鄭泮水頌魯於刪詩兩存之此意固以勸戒來者然當時高第出仕有民社者不一人也絃歌之聲自武城外無聞焉豈諸子所至視教化爲不急哉明王不興天下莫宗夫子況乎門人誦其所聞而施之有政吾知其以迂濶取譏也是則有志焉而不得遂者多矣今有地百里無不立學如趙侯之爲

湘陰竭兩年之力於此以幸惠邑之秀民使有安居以
誦習先聖之訓昔者及門之士豈得爲今之所爲乎噫
是固一時也然亦存乎其人國家能詔郡邑皆立學不
能使爲郡邑者皆留意於學俗吏苟存學之名春秋不得不
祀先聖先師終歲不得不盡闕諸生廩給如是而已綱
常非學不明俗化非學不厚暴亂非學不戢刑罰非學
不清國家以有學莫安閭里以有學順睦弱不勝衣循
循蹈規矩之士談詩書講道義以燕閒而世道陰賴之

蓋吾宋三百餘年收效於此久矣此趙侯所爲汲汲而有識之士以爲不如此則先聖所謂雖有粟吾焉得而食諸者也是役也市材食工爲費不貲而遷驛館易民廛之費不與焉侯以已俸佐之而遜地者捐力者亦感動於侯之義既成侯以書來求記曰子盍一言以遺湘士噫予固迂濶之尤者其復何云惟湘之士深念去聖人之世與聖人之居如彼其久且遠今也宮牆如在目中誦聲相聞如與諸子列侍以聽博文約禮之訓此聖

朝道化之澤而賢大夫爲邑識本末知先後之賜也世
道升降何常惟人心天理終可恃趙侯秩滿行矣此學
方新游其中者又推所學以淑鄉里將見邑人皆有士
君子之行而人才出焉得行道以兼善天下子孝臣忠
以長我國家豈無出於是學者乎予與趙侯共期之趙
侯寓居福州登戊戌進士第今官宣教郎是年秋八月
十有九日庚申廬陵歐陽某記



吳興齋文集卷十七